

**Broj: 06-03-1058-07/19**  
**Mostar, 15.01.2020. godine**

Na osnovu člana 21., člana 37., člana 84., člana 87. stav (1) i stav (2) i člana 93. Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13, 94/15 i 54/19), člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 42. stav (1) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14, 31/16 i 84/19), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12, 71/14 i 31/16), člana 18., člana 40. i člana 43. stav (1) Pravilnika za izdavanje dozvola („Službene novine Federacije BiH“ broj 2/17), člana 4. stav (1), člana 5. i člana 8. Pravilnika o metodologiji i načinu obračuna regulatornih naknada za imaoce dozvola - Pročišćeni tekst („Službene novine Federacije BiH“ broj 94/19), postupajući po Zahtjevu za izmjenu i dopunu dozvole za rad broj 06-03-1058/19 od 18.10.2019. godine podnosioca zahtjeva JP „Elektroprivreda HZ HB“ d.d. Mostar, Ulica kralja Petra Krešimira IV broj: 6-A, Mostar, u postupku izmjene i dopune Dozvole za rad – licence za obavljanje elektroprivredne djelatnosti distribucija električne energije broj 06-03-737/34/12, Regulatorna komisija za energiju u Federaciji Bosne i Hercegovine – FERK je 15.01.2020. godine na I redovnoj sjednici donijela sljedeće

## **RJEŠENJE**

1. Dozvola za rad – licenca za obavljanje elektroprivredne djelatnosti distribucija električne energije broj 06-03-737/34/12 izdata Rješenjem broj 06-03-737-15/34/12 od 18.12.2012. godine imaoca dozvole JP „Elektroprivreda HZ HB“ d.d. Mostar mijenja se i dopunjuje, te glasi kao u prilogu koji je sastavni dio ovog rješenja.
2. Dozvola za rad za distribuciju električne energije iz tačke 1. ovog rješenja važi do 31.12.2027. godine, sa uslovima dozvole koji čine njen sastavni dio.
3. Sastavni dio ovog rješenja čini dozvola za rad iz tačaka 1. i 2. ovog rješenja.
4. Imalac dozvole je obavezan plaćati regulatornu naknadu u periodu važenja dozvole na način i u iznosu koji utvrdi FERK posebnom odlukom.
5. Ovo rješenje je konačno, te se objavljuje na oglasnoj tabli i internet stranici FERK-a, a dispozitiv ovog rješenja u „Službenim novinama Federacije BiH”.

## **Obrazloženje**

FERK je 18.10.2019. godine pod brojem 06-03-1058/19 primio od JP „Elektroprivreda HZ HB“ d.d. Mostar Zahtjev za izmjenu i dopunu dozvole za rad, u postupku izmjene i dopune Dozvole za rad – licence za obavljanje elektroprivredne djelatnosti distribucija električne energije broj 06-03-737/34/12 imaoca dozvole JP „Elektroprivreda HZ HB“ d.d. Mostar, radi promjene adrese sjedišta društva.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da podneseni zahtjev nije potpun u smislu člana 12. Pravilnika za izdavanje dozvola. Zbog navedenog, FERK je postupajući u skladu sa članom 10. Pravilnika o javnim raspravama i rješavanju zahtjeva, sporova i žalbi uputio podnosiocu zahtjeva Obavještenje o nedostacima podnesenog Zahtjeva za izmjenu i dopunu dozvole za rad broj 06-03-1058-01/19 od 08.11.2019. godine, te mu odredio rok radi otklanjanja u obavještenju naznačenih nedostataka i upozorio ga na posljedicu propuštanja. Postupajući po obavještenju, podnosilac zahtjeva je dostavio dopis primljen u

FERK 15.11.2019. godine pod brojem 06-03-1058-02/19, uz koji je dostavio traženu dokumentaciju i obrazloženja, a na osnovu kojih je FERK utvrdio da je podneseni zahtjev potpun i da su se stekli uslovi za objavu obavještenja za javnost o nacrtu dozvole.

Na osnovu provedenog postupka tokom kojeg je izvršena pažljiva analiza svih činjenica i podnesenih dokaza na osnovu kojih se moglo utvrditi stanje stvari, FERK je u skladu sa članom 16. Pravilnika za izdavanje dozvola, pripremio Nacrt dozvole za rad za distribuciju električne energije po zahtjevu broj 06-03-1058/19 od 18.10.2019. godine podnosioca zahtjeva JP „Elektroprivreda HZ HB“ d.d. Mostar. Na osnovu člana 92. stav (2) Zakona o električnoj energiji u Federaciji Bosne i Hercegovine, FERK je Odlukom broj 06-03-1058-03/19 od 13.12.2019. godine usvojio Nacrt dozvole za rad za distribuciju električne energije, te Obavještenje za javnost o opštoj raspravi o Nacrtu dozvole za rad za distribuciju električne energije, kojom je ovaj nacrt upućen u proces javne rasprave. Ovom odlukom je imenovan voditelj postupka i zamjenik voditelja postupka, te je utvrđeno i da su zainteresovana lica imala mogućnost dostaviti svoje pisane komentare na Nacrt dozvole za rad za distribuciju električne energije na adresu FERK-a ili na elektronsku adresu, u periodu od 20.12.2019. godine do 10.01.2020. godine do 12:00 sati, kao i da su lica koje imaju direktan interes učestvovati u postupku izdavanja dozvole, pod uslovom da im je interes različit od opšteg javnog interesa, imala mogućnost podnijeti zahtjev za sticanje statusa umješaća na adresu FERK-a ili na elektronsku adresu, u periodu od 20.12.2019. godine do 10.01.2020. godine do 12:00 sati. Do ostavljenog roka za dostavu pisanih komentara, odnosno do 10.01.2020. godine do 12:00 sati, podnosilac zahtjeva je 10.01.2020. godine pod brojem 06-03-1058-04/19 dostavio u FERK svoje komentare, dok u FERK nisu primljeni ostali pisani komentari na Nacrt dozvole za rad za distribuciju električne energije, niti je primljen zahtjev za sticanje statusa umješaća. Komentari podnosioca zahtjeva su se odnosili na Prilog 1. - Područje djelovanja na kojem se obavlja djelatnost distribucije električne energije, sa prijedlogom da se kod Kantona Središnja Bosna pod tačkom 4. izmijeni tekst tako da glasi: 4. Nova Bila, dijelovi opštine Travnik, a kod Zeničko-dobojskog kantona ispravi tačka 4. tako da glasi: 4. Novi Šeher, dijelovi opštine Maglaj.

U skladu sa članom 16. stav (4) Pravilnika za izdavanje dozvola voditelj postupka pripremio je pisani izvještaj, koji je sadržavao komentare, analizu datih komentara i preporuku članovima FERK-a, te je ovaj izvještaj u skladu sa stavom (5) istog člana uputio podnosiocu zahtjeva na komentare 13.01.2020. godine pod brojem 06-03-1058-05/19.

Podnosilac zahtjeva je povodom navedenog u FERK dostavio 15.01.2019. godine dopis primljen pod brojem 06-03-1058-06/19 u kojem je naveo da nema dodatnih komentara na gore navedeni izvještaj.

Izvještaj voditelja postupka sa komentarima podnosioca zahtjeva dostavljen je članovima FERK-a dana 15.01.2020. godine pod internim brojem 06-08-70/20, na razmatranje radi donošenja odluke.

Dalje, članom 4. i članom 5. Pravilnika o metodologiji i načinu obračuna regulatornih naknada za imaoce dozvola propisana je dinamika i način obračuna regulatorne naknade za imaoce dozvola za obavljanje elektroprivrednih djelatnosti. Članom 8. istog pravilnika propisan je način utvrđivanja regulatornih naknada za imaoce dozvola za obavljanje elektroprivrednih djelatnosti, odnosno način donošenja rješenja kojim se utvrđuje pojedinačni iznos godišnje regulatorne naknade za svakog imalaca dozvole. O obavezi plaćanja regulatorne naknade imaoцу dozvole se ispostavlja posebno obavještenje.

Na osnovu obrade Zahtjeva za izmjenu i dopunu dozvole za rad podnosioca JP „Elektroprivreda HZ HB“ d.d. Mostar i dokumentacije priložene uz zahtjev, te analize komentara podnosioca zahtjeva datih u postupku opšte rasprave, odnosno izvještaja voditelja postupka i komentara podnosioca zahtjeva na izvještaj voditelja postupka, izvršena je izmjena i dopuna Dozvole za rad – licence za obavljanje elektroprivredne djelatnosti distribucija električne energije broj 06-03-737/34/12, zbog promjene adrese sjedišta društva. Osim navedenog, FERK je uočio i potrebu izmjene i dopune navedene dozvole za rad na osnovu člana 93. stav (1) Zakona o električnoj energiji u Federaciji Bosne i Hercegovine, a sve u javnom interesu. FERK je ocijenio da je opravdano izvršiti određena usklađivanja dozvole za rad sa odredbama Zakona o električnoj energiji u Federaciji Bosne i Hercegovine i Pravilnika za izdavanje dozvola. Kako je predmetna dozvola promijenila naziv u dozvolu za rad za distribuciju električne energije, kao i zbog potrebe izmjene i dopune više od polovice uslova dozvole za rad, radi preglednosti i lakšeg razumijevanja izmijenjenih i dopunjenih uslova dozvole, te radi ekonomičnosti i efikasnosti postupka izrade, donošenja i objave dozvole za rad, a sve imajući u vidu zahtjev podnosioca i javni interes pristupilo se izradi i usvajanju izmijenjene i dopunjene Dozvole za rad za distribuciju električne energije imalaca JP „Elektroprivreda HZ HB“ d.d. Mostar, koja je sastavni dio ovog

rješenja. Uvažavajući sve naprijed navedene razloge, predmetna dozvola za rad je izmijenjena i dopunjena u skladu sa zahtjevom podnosioca, te je usklađena sa odredbama naprijed navedenih Zakona o električnoj energiji u Federaciji Bosne i Hercegovine i Pravilnika za izdavanje dozvola, s tim da je period važenja dozvole ostao nepromijenjen. Postavljeni uslovi, u skladu sa članom 26. i članom 28. Pravilnika za izdavanje dozvola, stvaraju obavezu JP „Elektroprivreda HZ HB“ d.d. Mostar da u rokovima propisanim u uslovima dozvole za rad za distribuciju električne energije iste ispuni, u cilju zadovoljenja propisanih kriterija.

Na osnovu navedenog, odlučeno je kao u dispozitivu ovog rješenja.

**POUKA O PRAVNOM LIJEKU:**

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**PREDSJEDNIK FERK-a**  
**Mile Srdanović**

Dostaviti:

- JP „Elektroprivreda HZ HB“ d.d. Mostar (poštom preporučeno uz dostavnicu)
- Sektoru za tehničke poslove i licence